

Si fosse n'auciello

Si fosse n'auciello, ogne matina
vurria cantà 'ncoppa 'a fenesta toja:
«Bongiorno, ammore mio, bongiorno, ammore!»
E po' vurria zumpà 'ncoppa 'e capille
e chianu chiano, comme a na carezza,
cu stu beccuccio accusì piccerillo,
mme te mangiasse 'e vase a pezzechillo...
si fosse nu canario o nu cardillo.

Ll' ammore

Ll' ammore è comnae fosse nu malanno
Ca, all'intrasatta, schioppa dint' 'o core
senza n'avvertimento, senza affanno,
e te pò ffa' murì senza dulore.

Uocchie ca mme parlate

Chist' uocchie tuoie che cagneno
culore ogne mumento,
so' belle quanno chiagneno,
so' tutto sentimento.
Si rideno s'appicciano
comme a ddoie fiamme ardente,
songo stelle lucente
ca tiene 'nfronte tu.

'A cunzegna

'A sera quanno 'o sole se nne trase
e dà 'a cunzegna a luna p' 'a nuttata,
lle dice dinto 'a recchja: «l' vaco à casa:
t'arraccumanno tutt' 'e nnammurate»

'A nnammurata mia

'A nnammurata mia se chiama Ammore,
e tene ll' uocchie comme ll' acqua 'e mare.
E ddoce comme è ddoce 'a primmavera,
è tutta gentilezza, anema e core.

Core analfabeta

Stu core analfabeta
tu ll'hé purtato a' scola,
e s'è mparato a scrivere,
e s'è mparato a leggere
sultanto 'na parola:
Ammore e niente cchiù.